

四庫全書

子部

欽定四庫全書

太平御覽卷一百六

宋 李昉等 撰

皇王部三十一

隋高祖文皇帝

煬皇帝

隋高祖文皇帝

隋書曰高祖文帝姓楊氏諱堅弘農郡華陰人也漢太尉震八代孫鉉仕燕為北平太守鉉生元壽後魏代為

武川鎮司馬子孫因家焉元壽生太原太守惠瑕惠瑕
生平原太守烈烈生寧遠將軍禎禎生忠忠即皇考也
皇考從周太祖起義關西賜姓普六茹氏位至柱國大
司空隋國公薨贈太保謚曰桓皇妣呂氏以大統七年
六月癸巳夜生高祖於馮翊般若寺紫氣充庭有尼來
自河東謂皇妣曰此兒所從來甚異不可於俗間處之
尼將高祖舍於別館躬自撫養皇妣嘗抱高祖忽見頭
上角出遍體鱗起皇妣大駭墜高祖於地尼自外入見

曰已驚我兒致令晚得天下為人龍顏額有五柱入頂
目光外射有文在手曰王長上短下深沉嚴重初入太
學雖至親昵不敢狎也年十四京兆尹薛喜辟為功曹
十五以太祖勲授散騎常侍車騎大將軍儀同三司封
成紀縣公武帝即位遷左小宮伯出為隋州刺史進位
大將軍後徵還遇皇妣寢疾三年晝夜不離左右世稱
純孝宇文護執政尤忌高祖屢將害焉大將軍侯伏侯
壽等匡護得免其後襲爵隋國公武帝聘高祖長女為

皇太子妃益加禮重齊王憲言於帝曰普六如堅相貌非常臣每見之不覺自失恐非人下請早除之帝曰此可為將耳內史王軌驟言於帝曰皇太子非社稷主普六如堅貌有反相帝不悅曰必天命有在將若之何高祖甚懼深自晦匿建德中率水軍三萬破齊師於河橋明年從帝平齊進位柱國共宇文憲破齊任城王高潛於冀州除定州總管宣帝即位以後又徵拜上柱國大司馬大象初遷太僕丞右司武儀轉大府丞帝每巡幸

恒委以居守大象二年五月以高祖為揚州總管將發
暴有足疾不果行己未宣帝崩靜帝幼冲未能親理政
事內史大夫鄭譯御正大夫劉昉以高祖皇后之父眾
望所歸遂矯詔引高祖入總朝政都督內外諸軍事周
氏諸王在藩者高祖恐其生變稱趙王招將嫁女於突
厥為詞以徵之丁未發喪焉十月帝拜高祖假黃鉞左
丞相百官總已而聽焉十二月甲子周帝詔以郢州之
漢東二十郡為隋國劍履上殿入朝不趨贊拜不名備

九錫之禮加璽紱遠遊冠相國印綵紱綬位在諸王上
隋國置丞相已下一依舊文高祖再讓不許於是建臺
置官大定元年二月丙辰詔王冕十有二旒建天子旌
旗出警入蹕乘金根車駕六馬備五時副車置旄頭雲
罕樂舞八佾設鐘簾宮懸王妃為王后長子為太子前後
三讓乃授俄而周帝以衆望有歸乃下詔遣大宗伯大
將軍金城公趙熒奉皇帝璽符百官勸進高祖乃受焉
開皇元年二月甲子上自相府常服入宮備禮即皇帝

位於臨光殿設壇於南郊遣使柴燭告天是日大赦改
元為開皇六月癸未詔以初受天命赤雀降祥五德相
生亦為火色其郊及社廟依服冕之儀而朝會之服旗幟
犧牲各令尚赤戎服以黃秋七月乙未上始服黃百僚
畢賀二年六月丙申詔曰龍首山川原秀麗卉物滋阜今
茲肇造宜建定鼎之基永固無窮之業所在公私府宅
規模遠近營構資費隨事條奏詔左僕射高頴匠作大
匠劉龍鉅鹿郡公賀婁子幹太府少卿高龍等創造新

都三年春正月經營廟社規度宮闈秋八月乃用告成
四年春正月丙辰大赦甲子幸於仁壽宮忽上不豫八
月甲辰上疾甚卧於仁壽宮與百僚辭訣並握手歔歔
是時唯太子及陳宣華夫人侍疾太子無禮宣華訴之
帝怒曰死狗那堪付後事遽令召勇楊素秘不宣乃屏
左右令張衡入見帝血濺屏風冤痛之聲聞於外年六
十四在位二十四年

史臣曰高祖龍德在田奇表見外晦明歲用故知我者

稀始以外戚之尊受託孤之任與能之議未為當時所許是以周室舊臣或懷憤惋既而王謙固三蜀之阻不踰朞月尉遲舉全齊之衆一戰而亡斯乃非止人謀抑亦天之所贊也乘茲機會遂遷周鼎于時蠻夷猾夏荆揚未平劬勞日是經營四方樓舫南邁則金陵失險驍騎北驅則單于歛塞職方所載並入疆理禹貢所圖咸受正朔雖晉武之克平吳會漢宣之推亡固存比義論功不能尚也七德既敷九歌已洽要荒咸暨封侯無警躬

節儉平徭賦倉廩實法令行君子咸樂其生小人各安其業強無凌弱衆不暴寡人物殷阜朝野歡娛二十年天下無事區宇之內晏如也考之前王足以叅縱盛烈但素無學術不能任下無寬弘之度有刻薄之資暨乎期年此風愈扇又雅好祥瑞暗於大道建彼維城權侔宗室人皆怨望靡所適從聽讒婦之言惑邪臣之說溺寵廢嫡託付失人滅父子之道開昆弟之隙縱其斤斧剪伐本枝墳土未訖子孫繼重屠戮松楸纔列天下皆

非隋有惜哉迹其衰急之原稽其亂亡之兆起自高祖
成於煬帝所由來遠矣非一朝一夕其不祀忽諸未為
不幸也

煬皇帝

隋書曰煬皇帝諱廣一名英小字阿廢高祖第二子也
母曰文獻獨孤皇后上美姿儀少敏慧高祖及后於諸
子中特所鍾愛在周以高祖勲封鴈門郡公開皇元年
立為晉王拜并州總管時年十三尋授武衛大將軍進

位上柱國河北道行臺尚書令高祖令項城公歆安道
公才李徹輔導之上好學善屬文沉深嚴重朝野屬望
高祖密令善相者來和遍視諸子和曰晉王眉上雙骨
隆起貴不可言既而高祖幸上居見樂器絃多斷絕又
有塵埃若不用者以為不好聲妓甚善之上尤自矯當
時稱為仁孝嘗觀獵遇雨左右進油衣上曰士卒皆濡
濕我獨衣此乎乃令持去六年轉淮南道行臺尚書令
其年徵拜雍州牧內史令八年冬大舉伐陳以上為行

軍元帥及陳平進位太尉賜輅車乘馬袞冕之服玄珪
白璧各一復拜并州總管高祖之祀太山領武侯大將
軍明年歸藩後數載突厥寇邊復為行軍元帥出靈武
無虜而還及太子勇廢立上為皇太子是日當受冊高
祖曰吾以大興公成帝業令上出舍大興縣其夜烈風
大雪地震山崩民舍多壞壓死者百餘口仁壽初奉詔
而東是後高祖每避暑仁壽宮恒令上監國四年七月
高祖崩上即皇帝位於仁壽宮八月奉梓宮還京師并

州總管漢王諒舉兵乃詔尚書左僕射楊素討平之十一月癸丑詔可於伊維營建東京即設官分職以為民極也大業元年正月壬辰朔大赦改元立妃蕭氏為皇后改豫州為秦州洛州為豫州廢諸州總管府丙申立晉王昭為皇太子三月丁未詔尚書令楊素納言楊達將作大匠宇文愷建東京徙豫州居民以實之辛亥發河南諸郡男女萬餘開通濟渠自西苑引穀洛水達於河自板渚引河通於淮庚申遣黃門侍郎王弘上儀同

于士澄往江南採木造龍舟鳳輦黃龍赤艦樓舡等數
萬艘七月丙子詔曰今宇宙平一文軌攸同十步之內
必有芳草四海之中豈無奇秀諸在家及見入學者若
有篤志好古耽悅典墳學行敏優堪應時務所在採訪
具以名聞即當隨其器能擢以不次八月壬寅上御龍
舟幸江都以左武衛大將軍郭衍為前軍李景為後軍
文武官五品以上給樓舡九品以上給黃筏舡艦相接
二百餘里冬十月己丑赦江淮以南揚州給復五年舊

總管內給復三年二年春正月辛酉東京成賜監督者
各有差三月庚午車駕發江都夏四月庚戌上自伊闕
陳法駕備千乘萬騎入於東京辛亥御端門大赦免天
下今年租賦三年四月甲午詔曰夫孝悌有聞人倫之
本德行敦厚立身之基或節義可稱或操履清潔所以
激貪厲俗有益風化其執德不撓學義優敏文才秀美
並為廊廟之用寔乃瑚璉之資才堪將畧拔以禦侮膺
力驍壯任之爪牙爰及一藝可取亦宜採錄眾善畢舉

與時無棄以此求治庶幾非遠文武有職事者五品已上宜依今上十科舉人有一於此不必求備朕當待以不次隨才升擢丙申車駕北巡狩六月戊子次榆林郡丁酉啓民可汗來朝己亥吐谷渾高昌並遣使貢方物甲辰上御北樓觀漁於河以宴百寮秋七月辛亥啓民可汗上表請變服襲冠帶詔啓民贊拜不名位在諸王侯上甲寅上於郡城東御大帳其下備儀衛建旌旗宴啓民及其部落二千五百人奏百戲之樂賜啓民及其

部落各有差八月壬午車駕發榆林乙酉啓民飾廬清
道以候乘輿帝幸其帳啓民奉觴上壽宴賜極厚上謂
高麗使者曰歸語爾王當早來朝見不來吾與啓民巡
汝土矣皇后亦幸義城主帳己丑啓民可汗歸藩癸巳
入樓煩關壬寅次太原詔營晉陽宮九月己未次濟源
幸御史大夫張衡宅宴享極歡己巳至東都五年三月
己巳車駕幸河右乙亥幸扶風舊宅夏四月乙亥大獵
於隴西壬寅高昌吐谷渾伊吾并遣使來朝乙巳狄道

黨項羌來貢方物癸亥出臨津關渡黃河至西平陳兵
講武五月乙亥上獵於諸山長圍周亘二十里庚辰入
長寧谷度星嶺甲申宴羣臣於金山之上六月庚午次
張掖辛亥詔諸郡學業該通才藝優敏膂力驍壯超絕
等倫在官勤奮堪理政事立性正直不避強禦四科舉
人壬子高昌王麴伯雅來朝伊吾吐屯設等獻西域穀
千里之地上大悅丙辰上御觀風行殿盛陳文物奏九
部樂設魚龍幔延高昌王吐屯設於殿上以寵異之其

蠻夷陪列者三十餘國戊午大赦天下開皇已來流配
悉放還鄉晉陽逆黨不在此例也隴右諸郡給復一年
行經之所給復二年秋七月丁卯置馬牧於青海渚中
以求龍種無效而止九月癸未車駕入長安六年二月
庚申徵魏齊周陳樂人悉配太常三月癸亥幸江都宮
甲子以鴻臚卿史祥為左驍衛大將軍夏四月宴江淮
以南父老頒賜各有差七年二月己未上升釣臺臨揚
子津大宴百寮頒賜有差庚申百濟遣使朝貢乙亥上

自江都御龍舟入通濟渠遂幸於涿郡八年春正月辛巳大軍集於涿郡壬午下詔曰高麗小醜昏迷不恭崇大勃碣之間荐食遼穢之境親總六師用伸九伐拯厥阽危協從天意若高元泥首轅門自歸司寇即宜解縛焚櫬其餘臣民歸朝奉順咸加撫慰各安生業隨才任用無隔夷夏營壘所次務在整肅芻蕘有禁秋毫無犯布以恩宥諭以禍福若其同惡相濟抗拒官軍國有常刑俾無遺類明加曉示稱朕意焉總一百一十三萬三

千八百號二百萬其輸運者倍之癸未第一軍發糧四十日引師乃盡旌旗亘千里近古出師之盛未有之也三月癸巳上御師甲子臨戎於遼水橋戍戍大軍為賊所拒不果濟右屯衛大將軍左先祿大夫麥鐵杖武賁郎將錢士雄孟金乂等皆死之甲午車駕度遼大戰於東岸擊賊破之進圍遼東時諸將各奉旨不敢赴機既而高麗各城守攻之不下六月己未幸遼東責怒諸將止城西數里御六合城七月壬寅宇文述等敗績於薩水

右屯將軍辛士雄死之九軍並陷將帥奔還亡者二千
餘騎癸卯班師九月庚寅上至東都九年春正月丁丑
徵天下兵募民為驍勇集于涿郡二月戊寅幸遼東以
越王侗民部尚書樊子蓋留守東都庚子北海人郭方
頂聚徒為盜自號盧公衆至三萬攻陷郡城大噪而去
夏四月庚午車駕渡遼壬午遣宇文述楊義臣趣平壤
五月丁丑焚惑入南斗己卯濟北人甄寶車聚衆萬餘
寇掠城邑六月乙巳禮部尚書楊玄感反於黎陽丙辰

玄感逼東都河南贊務裴宏策拒之反為賊所敗戊辰
兵部侍郎斛斯政奔於高麗庚午上班師高麗犯後軍
八月壬寅左翊衛大將軍宇文述等破楊玄感於閭鄉
斬之餘黨悉平十年二月辛卯詔曰蕞爾高麗僻居荒
表鴟張狼噬侮慢不恭剽竊我邊陲侵奪我城鎮是以
去歲出軍問罪遼碣殪長蛇於玄菟戮封豕于襄平焚其城
郭汚其宮室高元伏質泥首送款軍門尋請入朝歸罪司寇朕
已許其改過乃詔班師而長惡靡悛安心鴟毒此而可


忍孰不可容便可分命六師百道俱進朕當親執武節
臨御都軍秣馬九都觀兵遼水順天誅於海外救窮民
於倒懸征伐以正之明德以誅之止除元惡餘無所問
三月壬子幸涿郡癸亥至臨渝宮親御戎服禡祭黃帝
斬叛軍者以纍鼓七月甲子高麗遣使請降送斛斯政
上大悅八月己巳班師十二月壬申上如東都大赦天下
戊子入東都十二年七月甲子幸江都宮以越王侗光
祿大夫段達大府卿元文都檢校民部尚書韋津右武

衛將軍皇甫無逸右司郎盧楚等總留後事十三年二月己丑馬邑校尉劉武周殺太守王仁恭舉兵作亂北連突厥自稱定陽可汗庚寅賊帥李密翟讓等陷興洛倉越王侗遣虎賁郎將劉長恭光祿少卿房胤擊之反為所敗死者十五六庚子李密自號魏公稱元年開倉以賑羣盜衆至數十萬河南諸郡相繼皆陷焉五月甲子唐公起義師於太原丙寅突厥數十寇太原唐公擊破之秋七月壬子熒惑守積屍丙辰武威人李軌等舉

兵反攻陷河西諸郡自稱涼王建元安樂八月辛巳唐公破武牙郎將宋老生於霍邑斬之十一月丙辰唐公入京師辛酉遙尊帝為太上皇立代王侑為帝改元義寧帝在江都聞唐公舉兵動容者久之以手舉案曰渠有異相渠得之矣如此者再三遂欲渡江幸青陽時宿衛諸將皆是秦人各有懷土之志宇文化及因人之心與裴虔通作亂入犯宮闈宿侍皆走遂扶帝出閣示眾數十罪復引帝入求鳩不得逼帝使坐以練縊之時年

五十蕭后令宮人撤床簀為棺以埋之化及敗右禦衛將軍陳稜奉梓宮於成象殿葬吳公臺下發歛之容貌若生衆咸異之唐平江南之後改葬雷塘初上自以藩王次不當立每矯情飾行以釣虛名陰有奪宗之計時高祖雅信文獻皇后而性忌媵妾皇太子勇內多嬖幸以此失愛帝後庭有子皆不育之示無私寵取媚於后大臣用事者傾心與交中使至第無貴賤皆曲承顏色伸以厚禮婢僕往來者無不稱其仁孝又常私入宮掖

密謀於獻后楊素等因極構扇遂成廢立



太平御覽卷一百六

欽定四庫全書

子部

太平御覽卷一百七至
十二

詳校官侍讀學士臣沈咸熙

員外郎臣牛稔文覆勘

總校官降調編修臣倉聖脈

校對官助教臣胡予襄

謄錄監生臣何需霖

欽定四庫全書

太平御覽卷一百七

宋 李昉等 撰

皇王部三十二

隋恭皇帝

李密

王世充

竇建德

隋恭皇帝

隋書曰恭皇帝諱侑元德太子之子也母曰韋妃性聰

敏有器度大業三年立為陳王後數載徙為代王邑萬戶及煬帝親征遼東令於京師總留事十一年從幸晉陽拜太原太守尋鎮京師義兵入長安尊煬帝為太上皇奉帝纂承大業十三年十一月壬戌上即皇帝位於大興殿詔大赦天下改義寧元年大辟罪已下咸赦除之甲子以光祿大將軍太尉唐公為假黃鉞使持節都督內外諸軍事尚書令大丞相進封唐王二年三月丙辰左屯衛將軍宇文弒太上皇於江都宮立秦王

浩為帝戊辰詔唐王備九錫之禮加璽綬速遊冠綠綬位在諸侯王上唐國置丞相已下一依舊式五月戊午詔曰天禍隋國大行太上皇遇盜江都酷甚望夷繫深驪北憫予小子奄逮丕讐哀號永感心懷靡潰仰惟荼毒仇復靡申形影相弔罔知啓處相國唐王應期命世扶危拯溺自北走南東征西怨總九合於一匡決百勝於千里糾率夷夏大庇民黎保乂朕躬繫王是賴德侔造化功格蒼旻兆庶歸心歷數斯在屈為人臣載違天命在昔

揖讓相推苟非重華誰堪命禹當今九服崩離三靈改
卜大運去矣請避賢路兆謀布德願已莫能私重命駕
須歸藩國予本代王及予而代天之所使豈其如是廣
憑稽古之典以誅四凶幸值維新之恩預充三恪雪冤
恥於皇祖守禋祀於孝孫朝聞夕殞及泉無恨今遵故
事遜於舊邸庶官羣辟改事唐朝宜依前典輒上尊號
若釋重負感泰兼懷假手真人俾除醜逆濟濟多士明
知朕意仍勅有司凡有表奏皆不得以聞是日上遜位

於大唐唐以上為鄴國公武德二年夏五月崩時年十五

史臣曰恭帝年在幼冲遭家多難一人失德四海土崩羣盜蜂起豺狼塞路南巢遂往流彘不歸既鍾百六之期躬踐數終之運謳歌有屬笙鏞變響雖欲不遵堯舜之迹其庸可得乎

李密

唐書曰李密字玄邃遼東襄平人也父寬隋上柱國蒲

山公密以父蔭為左親侍常在仗下煬帝顧見之退謂
許公宇文述曰向者在仗下小兒為誰許公對曰故蒲
山公李寬子密也帝曰箇黑色小兒視瞻異常勿令宿
衛他日述謂密曰弟聰令如此當以才學取官王衛瓘
勝非養賢之所密大喜因謝病專以讀書為業時人希
見其面嘗欲尋色愷乘一黃牛被以蒲鞞仍將漢書一
帙掛於角上一手捉牛靽一手翻書卷尚書令越國公
楊素見於道從後按轡躡之既及問曰何處書生耽學

若此密識越國公乃下而再拜自言姓名又問所讀書
答曰項羽傳越公竒之與語大悅謂其子玄感等曰吾
觀李密識度汝等不及於是玄感傾心結託大業九年煬
帝伐高麗調兵將天下騷動玄感將謀舉兵潛遣人入
關迎密以為謀主密至謂玄感曰今天子出征遠在遼
外今公擁兵出其不意長驅入薊直扼其喉前有高麗
退無歸路不過旬朔資糧必盡舉麾一召其衆自降不
戰而擒此計之上也關中四塞天府之國若西入長安

掩其無備天子雖還失其襟帶據險臨之故當必尅萬全之勢此計之中也若隨近逐便先向東都頓堅城之下勝負殊未可知此計之下也玄感曰公之下計乃上策也密計遂不行及玄感敗密乃間行入關為捕者所獲時煬帝在高麗密與其黨俱送帝所及出關外防禁漸弛密乃多市酒食每夜讌飲誼譁竟夕使者不以為意行至邯鄲密等七人夜穿牆而遁詣淮陽隱姓名自稱劉智遠聚徒教授經數月密鬱鬱不得志為詩曰金

風盡初節玉露凋晚林此夕窮途士鬱陶傷寸心野坪
葭葦合村落藿藜深眺聽良多感徒淚獨霑襟霑襟何
所為悵然懷古意秦俗猶未平漢道將何冀樊噲市井
屠蕭何刀筆吏一朝時運會萬古傳名謚寄言世上英
虛名其所愧詩成而泣下數行會東都賊帥翟讓者聚
黨萬餘人密往歸之密因王伯當以策干讓曰當今主
昏於上人怨於下銳兵盡於遼東和親絕於突厥方乃
巡遊揚越委棄京都此亦劉項奮起之會以足下雄材

大畧席卷二京誅滅暴虐則隋氏不足亡也翟讓深加
敬異遣說諸小賊所至皆降密又說讓曰今兵衆既多
糧無所出若直取滎陽休兵館穀待士馬肥充然後可
與人爭利讓以為然於是破金堤關掠滎陽諸縣堡城
多下之滎陽太守楊慶及通守張須陁以兵討讓讓懼
將遠避之密曰須陁勇而無謀兵又驟勝既驕且狠可
一戰而擒之公但列陣以待為公破之將戰密分兵千
餘人於林木間設伏讓與戰不利稍却密發伏自後掩

之須陲衆潰與讓合擊大破之遂斬須陲於陣讓於是
令密別統所部密尋復說讓曰昏主蒙塵播蕩吳越羣
兵競起海內飢荒明公以英傑之才統驍雄之旅宜當
廓清天下誅剪羣凶豈可求食草間為小盜而已今東
都士庶中外離心留守諸官政令不一明公親率大衆
直掩興洛發倉粟以賑窮乏遠近孰不歸附百萬之衆
一朝可聚先發制人此機不可失也讓曰請君先發僕
領諸軍便為後殿得食之日當別議之大業十三年春

密與讓領兵七千人出陽城北踰方山自羅口襲興洛倉破之恣人所取老弱襁負道路不絕衆至數十萬隋越王侗遣虎賁郎將劉長恭率步騎二萬五千討密密一戰破之長恭僅以身免讓於是推密為主號魏公二月於鞏南設壇場即位稱元年其文書行下稱行軍元帥魏公府拜崔讓為司徒封東郡公於是城洛口以居之隋虎賁郎將裴仁基率其子行儼以虎牢歸密因遣仁基與孟讓率兵二萬餘人襲興洛倉破之入東都郭

郭掠居人燒天津橋東都出兵乘之仁基等大敗密復親率兵三萬逼東都將軍段達等出兵七萬拒之戰於故都城隋軍敗走密復下興洛而據之大修營塹以逼東都仍作書穀煬帝十罪以移郡縣密兵鋒甚銳每入陣與隋軍連戰會密為流矢所中卧於營內東都復出兵乘之密衆大潰棄興洛倉歸於洛口煬帝遣王世充率勁卒五萬擊之密與戰不利世充營於洛西與密相拒百餘日大小六十餘戰武陽郡丞元寶藏黎陽賊帥

李文相平原賊帥郝孝德並歸於密共襲破黎陽據之
翟讓部將王儒信勸讓為大冢宰總統眾務以奪密之
權讓兄寬復謂讓曰天子止可自作安得與之汝若不
能作我當為之密聞其言陰有圖讓之計會世充列陣
而至讓出拒之為世充所擊讓軍少失利密率精銳赴
之世充敗走明日讓至密所欲為宴樂具饌以待之密
引讓入座以良弓示讓讓方引滿密遣壯士自後斬之
并殺其兄寬及王儒信讓部將徐世勣單雄信等頓首

求哀密并釋而慰諭之乃命徐世勣單雄信王伯當分
統其衆未幾世充襲倉城密復破之世充復移營洛北
造浮橋悉衆以擊密密與千餘騎拒之不利而退世充
因薄其城下密簡銳卒數百人以邀之世充大潰乘勝
陷偃師於是修金墉城居之有衆三十餘萬將作大匠
宇文愷叛東都降於密東至海岱南至江淮郡縣莫不
遣使歸密竇建德朱粲楊士林孟海公徐玄朗盧祖尚
周法明等並遣使通表於密勸進於是密下官屬咸勸

密即尊號密言東都未平不可議此及義旗建密負其
強盛欲自為盟主乃致書於高祖為兄請合從以滅隋
高祖覽書笑曰李密陸梁放肆不可以折簡招致吾方
安輯京師未遑東討即相阻絕此便是更生一敵吾寧
推顧使驕其志我得留關中大事濟矣乃復書曰天生
蒸民必有司牧當今為牧非子而誰惟弟早膺圖錄以
寧兆民宗盟之長屬籍見容得復封于唐斯榮足矣密
得書甚悅示其部下曰唐公見推天下不足定於是不

虞義師而專意於世充俄而宇文化及率衆自江都北
指黎陽兵十餘萬密乃自將步騎二萬拒之隋越王侗
稱尊號遣使者授密太尉尚書令東南道大行臺行軍
元帥魏國公令先平化及然後入朝輔政密將與化及
相抗恐前後受敵因卑辭以報謝焉化及至黎陽與密
相遇密遣徐世勣守倉城化及攻之不能下密知化及
糧且盡因偽與和以弊其衆化及弗之悟大喜恣其兵
食冀密饋之後知其詐化及怒與密大戰於衛州之童

山下密為流矢所中頓於汲縣化及力竭糧盡眾多叛之掠汲縣北趣魏縣密引兵而西遣使朝於東都執弑煬帝者于弘達以獻越王侗侗召密入朝至溫縣聞世充作難而止乃歸金墉城密雖據倉而無府庫兵數戰皆不獲賞又厚撫初附之兵由是眾心漸離武德元年九月世充以其眾五千來決戰密留王伯當守金墉自引精兵就偃師北阻邙山以待之世充軍至密遂敗績萬餘人馳向洛密將入洛口倉城邴元真已遣人潛引

世充密因知之不發其事欲待世充兵半渡洛水然後
擊之及世充軍至密候騎不時覺比將出戰世充軍已
濟矣密自度不能支引騎而遁往赴武平元真以城降
於世充密將入黎陽或人謂密曰向殺程讓徐世勣等
傷幾死創猶未平安可保乎時王伯當棄金墉保河陽
密以輕騎自武平歸之謂伯當曰兵敗矣徒苦諸君我
今自刎請以謝衆伯當抱密號咷慟哭衆皆莫敢仰視
密復曰諸君幸不相棄當共歸關中密雖無功諸君必

富貴於是從入關尚二萬人高祖遣使迎勞相望於道
密大喜謂其從曰我有衆百萬一朝至此命也今敗歸
國幸蒙殊遇當思竭忠以奉所事耳且山東連城數百
知吾至此遣使招之盡當歸此於竇融勲亦不細豈不
堪一台司見處乎及至京師禮數益薄尋拜光祿大夫
卿封邢國公未幾聞其所部將帥皆不附世充高祖使
密領本兵往黎陽招集故時將士經畧世充時王伯當
為左武衛將軍亦令為副密行至桃林高祖復徵之密

大懼謀將叛伯當力止之密不從因謂密曰義士之立志不以存亡易心伯當荷公恩禮期以性命相報乃簡驍勇數十人著婦人衣載貲裝藏刀裾下詐為妻妾自牽之入桃林縣舍須臾變服突出因據縣城驅掠畜產直趣南山時右羽衛將軍史萬寶留鎮熊州遣副將盛彥師率步騎數千追躡至陸渾縣南七十里與密相及彥師伏兵山谷密軍先渡橫出擊敗之遂斬密

王世充

唐書曰王世充字行滿祖西域人祖支頹稱世充頗涉經史尤好兵法及龜筮推步之術開皇中以軍功拜儀同善敷奏明法律然舞弄文法高下其心或有辨駁之者世充利口飾非辭義鋒起衆雖知其不可而莫能屈大業中累遷江都郡丞兼領江都宮監時煬帝數幸江都世充善候人主顏色阿諛順旨每入言事帝必稱善乃雕飾池臺因奉遠方珍物以媚於帝由是益信之十年齊郡賊帥孟讓自長白山寇掠諸郡至盱眙有衆十萬

世充以兵拒破之煬帝以世充有將帥才畧復遣領兵討捕諸小盜所向盡平十一年突厥圍煬帝於雁門世充盡發江都人將往赴難在軍中蓬首垢面悲泣焦勞曉夜不解甲藉草而卧煬帝聞之以為忠益信任之十二年遷江都通守及李密攻陷洛口倉建逼東都煬帝詔世充大發兵於洛口以拒密又遣就軍拜世充為將軍趣令破賊世充引軍渡洛水與李密戰世充軍敗績乃率餘衆歸河陽時天寒大雪比至河陽纔存數千世

充自繫請罪越王侗遣使赦之徵還洛陽置營於含嘉倉城收合亡散復萬餘人俄而宇文化及作難越王侗遂嗣位於東都拜世充為吏部尚書封鄭國公進拜尚書左僕射總督內外諸軍事世充去含嘉城移居尚書省專宰輔政以其兄世暉為內史令入居禁中弟咸擁兵馬鎮諸城邑未幾李密破宇文化及還其勁兵民馬多戰死士卒疲倦世充欲乘其弊而擊之恐人心不一乃假托鬼神言夢見周公乃立祠於洛水遣巫言周公

欲令僕射急擊李密當有大功否則兵皆疾死充兵多
楚人俗信妖言皆請戰充簡鍊精勇得二萬餘人馬二
千餘疋軍於洛水南密軍偃師北山上充令軍人秣馬
蓐食遲明而薄密密軍潰以數十騎走河南率餘衆入
朝世充盡收其衆振旅而還侗進世充太尉以尚書省
為府備置官屬充嘗於侗前賜食還家遂大吐嘔疑遇
毒所致自是不復詣朝諷侗欲加九錫之禮二年三月
遂策授相國總百揆封鄭王加九錫備物段達雲定興

等入見於侗曰天命不常鄭王功德甚盛願陛下揖讓
告禪遵唐虞之迹侗怒四月假為侗詔策禪位遣兄世
暉廢侗於含涼殿僭皇帝位建元曰開明國號鄭立子
玄應為皇太子世充每朝聽必殷勤訓諭言詞重複千
端萬緒或輕騎遊歷街衢亦不清道謂人曰昔時天子
深坐九重下情無由開徹世充非貪寶位本欲救時今
當如一州刺史每事親覽當與士庶共評朝政今特於
順天門外置座聽朝又令西朝堂受屈抑東朝堂受直

諫於是獻書言事日有數百條疏奏既煩省覽難遍數日不復更出世充遣其將士鵠殺侗諡曰恭皇帝十一月世充率衆東徇至滑州以兵臨黎陽世充屯兵不敢進倉粟日盡城中人相食七月秦王率兵攻之陳兵於青城宮世充悉兵來拒隔澗而言曰隋末喪亂天下分崩長安洛陽各有分地世充唯願自守不敢西侵王乃過相侵逼遠入吾地三分其道千里饋糧以此出師未見其可太宗謂曰四海之內皆從正朔惟公執迷獨阻

聲教東都士庶亟請王師開張義勇咸思致力至尊重
違衆願有所弔伐若轉禍來降則富貴可保如故相抗
無假多言世充無以對太宗分遣諸將攻其城鎮所至
輒下九月王君廓攻拔世充輶轅後河南州縣相次降
附十一月竇建德遣人結好并陳救援之意世充乃遣
其兄子琬及內史令長孫安世報急且乞師四年二月
世充率兵出方諸門與王師相抗世充兵敗因乘勝追
之屯其城門世充不復敢出但嬰城自守以待建德之

援三月秦王擒建德并王琬長孫安世等于虎牢回至東都城下以示之且遣安世入城言敗狀世充惶惑不知所為將潰圍出南走襄陽問諸將皆不答乃率其將吏詣軍門請降秦王以世充至長安高祖數其罪世充對曰計臣之罪誠不容誅但陛下愛子秦王許臣不死高祖乃釋之與兄芮妻子同徙於蜀將行為仇人獨孤循德所殺世充自篡位凡三年而滅

竇建德

唐書曰竇建德漳州漳南人少時頗以然諾為重為里長犯法適亡去會赦得回父卒送葬者千餘人有所贈皆讓而不受大業七年募人欲討高麗本郡遂補建德為隊長是時山東大水人多流亡邑人孫安祖者妻子俱已餒死縣以安祖驍勇過人亦選在其中安祖辭貧自往言於漳南令令怒遂笞之安祖刺殺令亡投建德建德舍之是歲山東大饑建德謂安祖曰丈夫不死當立大功豈可為逃亡之虜也高難泊中廣大穀百里與

阻深遠可以逃難乘間而去虜掠足以自資既得衆人
且觀時變當必有大功於天下矣安祖然其計建德招
誘逃亡兵及無產者因得數百人令安祖率之入泊中
為盜安祖自稱將軍時有隄人張金稱者亦結聚得萬
餘人在河阻中蓆人高士達亦得兵數千餘人在於清
河界中時諸盜賊往來漳南者所遇皆殺掠居人焚燒
舍宅獨不入建德之間由是郡縣意建德與賊交結遂
收繫家屬無少長盡皆殺之建德聞其家已被屠戮乃

率麾下二千人亡歸於士達士達自稱為東海公以建德為司兵後安祖為張金稱所殺其兵數千人又盡歸於建德自此盜兵漸至萬餘人猶往來高難泊中十二年涿郡通守郭絢率精兵萬餘人來討士達士達自以智畧不及建德乃推軍司馬咸以兵授焉建德既初董眾欲立奇功以滅羣盜請士達守其輜重自簡精兵七千人以拒絢大破絢軍絢於是以數千騎遁走遣將追及平原斬其首以獻士達由是建德之聲勢益振隋遣

太僕卿楊義臣率兵萬餘人討張金稱破之於清河所
獲賊衆皆屠滅餘散草澤間者後皆相聚共投建德義
臣乘勝至平原欲入高谿泊建德謂士達曰吾觀隋將
善用兵者惟義臣耳新破金稱遠來襲我其鋒不可當
請引兵避之令其欲戰不得空延歲月必將疲倦乘便
襲擊可有大功今若爭鋒恐公不能當也士達不從其
言因留建德守壁自率精兵迎擊義臣果破士達於陣
前斬之乘勝追奔將圍建德守兵既少聞士達敗衆皆

潰散建德率百餘騎亡去義臣殺士達以為建德不足
憂建德急還平原招集士卒得數千人軍復大振始自
稱將軍此後諸郡縣長吏率城以降之軍容於是益盛
勝兵十餘萬人十三年正月築塙塙於河界樂壽邑中
自稱長樂王進攻河間頻戰不下其後城中食少又聞
煬帝被殺郡丞王琮率吏卒發喪建德遣使弔之琮因
使請降始都樂壽號曰金城宮自是郡縣率多下之武
德二年宇文化及僭號於魏縣建德即日起兵討化及

保聊城建德四面攻城陷之建德入城先謁隋皇后蕭氏語稱臣遂悉收弑煬帝首謀者斬之梟首於轅門之外囚化及并其二子同收檻車後斬之攻陷洛州虜刺史袁子斬之遷都於洛州因號為萬春宮又與王世充交結遣使朝隋越王侗於洛陽後世充為侗廢立事乃與之絕交因始自為進尊號別立名位以振當時大建天子旌旗出入警蹕下書言詔追謚煬帝為閔帝然猶依附突厥隋義城公主先嫁突厥又傳化及首以獻公

主既與突厥相連兵鋒益盛南侵相州河北大使淮安王神通不能拒退奔黎陽相州陷又進攻衛州陷黎陽九月建德自帥師圍幽州羅藝出與戰大破之斬首千二百級先是曹州濟陰人孟海公擁精兵三萬據周橋城以掠河南之地其年十一月建德自率兵渡河以擊之四年二月建德尅周橋虜海公留其將范願守曹州悉發海公及徐圓朗之衆來救世充軍至滑州世充行臺僕射韓洪開城納之遂進逼元州梁州營州皆陷之

屯於滎陽三月春秦王入武牢進薄其營多所傷殺并擒其將殷秋石瓚時世充弟世辨為徐州行臺遣其將郭士衡領兵千人從之合衆十萬餘號為三十萬次成皋築宮於坂堵以示必戰又遣間使約世充為表裏秦王遣將軍王君廓領輕騎十餘抄其糧運獲其將張青持等其衆多思歸洛州凌敬進說曰兵宜悉濟河攻取懷州河陽使重將居守更率衆鳴鼓建旗踰太行入上黨先聲後實傳檄而定漸趨壺口騷駭蒲津收河東之

地此策之上也行此必有三利一則入無人之境師有萬全二則招士得兵三則鄭圍自解建德將從之而世充之長史長孫安世陰賣金玉啗其諸將以亂其謀衆咸進諫曰凌敬書生耳豈可與言戰乎建德從之敬固爭建德怒扶出馬於是悉衆進逼武牢官軍按甲剴其銳建德結陣於汜水秦王遣騎挑之建德進軍而戰竇杭當之建德少却秦王馳騎深入大破之建德中創竄於牛口渚車騎將軍白士讓楊武威生獲之建德所領

兵衆一時奔潰妻曹氏及其左僕射齊善行將數百騎遁於洛州餘黨欲立建德養子為主善行曰夏王平定河朔士馬精強一朝既被擒如此豈非天命有所歸也不如委心請命無為塗炭生人遂以府庫財物分與故將各令散去善行乃與建德右僕射裴矩行臺曹旦及建德妻率其官屬舉山東之地奉傳國八璽來降七月秦王俘建德至京師斬於長安市年四十九自起至滅凡六歲河北悉平

太平御覽卷一百七

欽定四庫全書

太平御覽卷一百八

宋 李昉等 撰

皇王部三十三

唐高祖神堯皇帝

唐高祖神堯皇帝

唐書曰高祖神堯皇帝姓李諱淵其先隴西狄道人涼武昭王暉七代孫也暉生歆歆生重耳仕魏為弘農郡

太守重耳生熙為金門鎮將領豪旗鎮武川因家焉儀
鳳中追尊宣皇帝熙生天賜仕魏為幢主儀鳳中追尊
光皇帝生皇祖諱虎後魏左僕射封隴西郡公與周文
帝及太保李弼大司馬獨孤信等以功叅佐命當時稱
為八柱國家乃賜姓大野氏周受禪追封唐國公至隋
文帝作相還復本姓武德初追尊景皇帝廟號太祖皇
考諱昞音丙周安州總管柱國大將軍襲唐國公諡曰仁
武德初追尊元皇帝廟號世祖高祖以周天和元年生

於長安年七歲襲唐國公及長個儻豁達任性直率寬
仁容衆無貴賤咸得其歡心隋受禪補千牛備身文帝
獨孤皇后即高祖之從母也由是時見親愛累轉譙隴
岐三州刺史有史世良者善相人謂高祖曰公骨非常
必為人主願自愛勿忘鄙言高祖頗以自負大業初為
滎陽樓煩二郡太守徵為殿內少監九年遷衛尉少卿
遼東之後督運於懷遠鎮及楊玄感反詔高祖馳驛鎮
弘化郡兼知關右諸軍事高祖歷試中外素樹恩德及

是招納豪傑衆多款附時煬帝多所猜忌人懷疑懼會有詔徵高祖詣行在所遇疾未謁時甥王氏在後宮帝問曰汝舅何遲王氏以疾對曰可得死不高祖聞之益懼因縱酒沉湎納賄以混其迹焉十一月煬帝幸汾陽宮命高祖往山西河東黜陟討捕師次龍門賊帥馬端兒帥數十薄於城下高祖從十餘騎擊之所射七十發皆應弦而倒賊乃大潰十三年為太原留守郡丞王威武牙郎將高若雅為副將羣賊蠭起江都阻絕太宗以

晉陽令劉文靜及門下客長孫順德劉弘基各募兵旬日間衆具一萬密遣使召世子建成及元吉於河東威與君雅見兵大集恐高祖為變相與疑懼請高祖祈雨於晉祠將為不利晉陽卿劉世龍知之以告高祖陰為之備五月甲子高祖與威君雅視事太宗密嚴兵於外以備非常遣開陽府司馬劉政會告威等謀反即斬之以徇遂起義兵遣劉文靜為使於突厥始畢可汗令率兵相應六月甲申命太宗將兵向西河下之癸巳建大

將軍府并置三軍分為左右開倉以賑窮乏遠近響應
秋七月高祖率兵西圖關中以元吉為鎮北將軍太原
留守癸丑發自太原有兵三萬餘丙辰師次靈石營於
賈胡堡隋武牙郎將宋老生屯霍邑以拒義師會霖雨
積旬餽運不給高祖命旋師太宗切諫乃止有白衣老
父詣軍門曰余為霍山神使謁唐皇帝曰八月雨止路
出霍邑東南吾當濟師高祖曰此神不欺趙無卹豈負
我哉八月辛巳高祖引師趨霍邑斬宋老生平霍邑丙

戍進下臨汾郡及絳郡癸巳至龍門突厥始畢可汗遣
康稍利率兵與劉文靜會于麾下隋驍衛大將軍屈突
通鎮河東津梁斷絕關中向義者頗以為阻於是水濱
居人競進舟楫不謀而至者前後數百人九月壬寅馮
翊賊帥孫華土門賊帥白玄度各率其眾送款并且舟
楫以待義師高祖令華與統軍王長諧劉弘基引兵渡
河屈突通遣其虎牙郎將桑顯和率兵數千夜襲長諧
義師不利太宗以遊騎數百掩其後顯和潰散義師復

振丙辰馮翊太守萬造以郡來降戊午高祖親率衆圍河東屈突通自守不出乃命攻城不利而還文武將吏請高祖領太尉加置僚佐從之華陰令李孝常以永豐倉來降庚申唐高祖率軍濟河舍長春宮三秦士庶至者以千數高祖禮之咸過所望人皆喜悅丙寅遣隴西公建成司馬劉文静屯兵永豐倉兼守潼關以備他盜太宗率劉弘基長孫順德等前後數萬人自渭北徇三輔所至皆下高祖從父弟神通起兵鄠縣柴氏婦起兵

於司竹至是並與太宗會乙亥命太宗自渭汭屯兵阿
城隴西公建成自新豐趣霸上高祖率大軍自下邳西
所經煬帝行宮園苑悉罷之宮女放還親屬冬十月已
巳至長樂宮有衆二十萬隋京師留守刑部尚書衛文
昇右翊將軍陰世時京兆郡丞滑儀挾代王侑音宥以拒
義師高祖遣使至城下喻以匡復之義再三皆不報諸
將固請圍城十一月丙辰攻拔京城衛文昇先以病死
陰世師滑儀等拒義兵並斬之癸亥率百僚備法駕立

代王侑為天子遙尊煬帝為太上皇大赦改元為義寧
甲子隋帝詔加高祖假黃鉞使持節大都督內外諸軍
事大丞相進封唐王總錄萬機以武德殿為丞相府改
教為令以隴西公建成為唐國世子太宗為京兆尹改
封秦公臧公元吉為齊公十二月乙未丞相府置長史
司錄以下官僚金城賊帥薛舉寇扶風命太宗為元帥
擊之遣趙郡公李恭招慰山南所至皆下癸巳太宗大
破薛舉之眾於扶風屈突通自潼州奔東都劉文静等

追擒於閩

音聞

鄉虜其衆數萬河南大守蕭瑀以郡降丙

午遣雲陽令詹俊武沂縣正李仲充徇巴蜀下之二年

春正月戊辰世子建成為撫安大將軍東討元帥太宗

為副總兵七萬徇地東都三月丙辰右屯衛將軍宇文

化及弒隋太上皇於江都宮立秦王浩為帝自稱大丞

相徙封太宗為趙國公戊辰隋帝進高祖位相國總百

揆備九錫之禮唐國置丞相以下立皇高祖以下四廟

於長安通義里第夏四月戊戌世子建成及太宗自東

都班師五月乙巳天子詔高祖寬十二旒建天子旌旗
出警入蹕王后與王子王女爵命之號一遵舊典戊午
隋帝詔遣使持節兼太保刑部尚書光祿大夫梁郡公
蕭造兼太尉司農少卿裴之隱奉皇帝璽綬于高祖高
祖辭讓百僚上表勸進至於再三乃從之隋帝遜於舊
邸改大興殿為太極殿甲子高祖即皇帝位於太極殿
命刑部尚書蕭造兼太尉告于南郊大赦天下改隋義
寧二年為唐武德元年官人百姓賜爵一級義師所行

之處給復三年罷郡置州改太守為刺史丁卯宴百官
於太極殿賜帛有差東都留守兵立隋越王侗為帝壬
申命國相長史裴寂等修律令六月甲戌太宗為尚書
令廢隋大業律令頒新格乙卯備法駕迎皇高祖宣簡
公已下神主入太廟追謚妃竇氏為穆皇后庚辰立世
子建成為太子太宗為秦王齊國公元吉為齊王諸州
總管加號使持節癸未封隋帝為鄴國公薛舉寇涇州
命秦王為西討元帥征之改封永康王神通為淮安王

壬辰加秦王為雍州牧餘官如故秋七月秦王與薛舉大戰於涇州我師敗績八月壬午薛舉死其子仁果復僭稱帝命秦王為元帥討之涼州賊帥李軌以其地來降拜涼州總管封涼王九月乙巳親錄囚徒辛未追謚隋太上皇為煬帝字文化及至魏州鴆殺秦王浩僭稱天子國號許冬十月李密率眾來降十一月秦王大破薛仁果於淺水原降之隴右平乙巳涼王李軌僭稱天子於涼州詔頒五十三條格以約法緩刑十二月壬申

加秦王太尉陝東道大行臺庚子李密叛於桃林行軍
總管盛彥師追討斬之二年春二月丁酉竇建德攻宇
文化及於聊城斬之傳首突厥閏月辛丑劉武周侵我
并州己酉李密舊將徐世勣以黎陽之衆及河南十郡
降授黎州總管封曹國公賜姓李氏庚戌上徵行都邑
以察北俗即日還宮甲寅賊帥朱粲殺我使散騎常侍
段確奔洛陽夏四月乙巳王世充篡越王侗僭稱天子
國號鄭辛亥李軌為其偽尚書安興貴所執以降河右

平九月辛未賊帥李子通據江都僭稱天子國號吳沈
法興據毘陵僭稱梁王丁丑和州賊帥杜伏威遣使來
降授和州總管東南道行臺尚書令封楚王裴寂與劉
武周將宋金剛戰於介州我師敗績右武衛大將軍姜
寶誼死之并州總管齊王元吉懼武周所逼奔於京師
并州陷乙未京師地震甲子上親祠華山十一月丙子
竇建德陷黎陽盡有山東之地淮安王神通左武信大
將軍李世勣皆沒於賊十二月丙申永安王李基工部

尚書獨孤懷恩總管于筇為劉武周宋金剛掩襲並殺
焉甲辰狩於華山壬子大風拔木三年春正月辛巳幸
蒲州命祀舜廟癸巳上至自蒲州甲午李世勣於竇建
德所自拔歸國建德僭稱夏王四月甲寅加秦王益州
道行臺尚書令秦王大破宋金剛於介州金剛與武周
俱奔突厥遂平并州偽總管尉遲敬德等以介州降六
月壬辰徙封楚王杜伏威為吳王賜姓李氏加授東南
道行臺尚書令丙午親錄囚徒七月壬戌命秦王率諸

軍討王世充遣皇太子鎮蒲州以備突厥丙申突厥殺
劉武周於白道冬十月庚子懷戎賊帥高開道遣使來
降授蔚州總管封北平郡王賜姓李氏四年五月乙未
秦王大破竇建德之眾於武牢擒建德河北悉平丙寅
王世充舉東郡降河南平秋七月甲子秦王凱旋獻捷
太廟丁卯大赦天下廢五銖錢行開元通寶斬竇建德
於市流王世充於蜀甲戌建德餘黨劉黑闥據漳南反
置山東道行臺尚書省於洛州秋八月兗州總管徐圓

朗舉兵反以應劉黑闥僭稱魯王冬十月乙丑加秦王
天策上將軍位在王公上領司徒陝東道大行臺尚書
令齊王元吉為司空乙巳趙郡王李恭平荊州獲蕭銑
五年春正月丙申劉黑闥據洺州僭稱漢東王三月丁
未秦王破劉黑闥於洺水上盡復所陷州縣黑闥亡奔
突厥蔚州總管北平王高開道叛寇易州夏四月庚戌
秦王還京師高祖迎勞於長樂宮壬申代州總管定襄
郡王大恩為虜所敗戰死六月劉黑闥引突厥寇山東

置諫議大夫官。貞七月，隋漢陽太守馮益以南越之地來降。嶺表悉定。八月辛亥，以洛荆并幽交五州為大總管府。改封恒山王承乾為中山王，葬隋煬帝於揚州。丙辰，突厥頡利寇雁門。乙未，進寇朔州。遣皇太子及秦王討擊。大敗之。冬十月己酉，遣齊王元吉擊劉黑闥於洺州。時山東州縣多為黑闥所守，所在殺良吏以應之。行軍總管淮陽王道玄與黑闥戰於下博。道玄敗沒。十一月甲申，命皇太子率兵討劉黑闥。丙申，幸宜州簡閱將士十二

月庚辰校獵於華池庚申至自宜州皇太子破劉黑闥
於魏州斬之山東平六年春二月辛卯校獵於驪山三
月乙未幸昆明池宴百官夏四月己未幸舊宅改為通
義宮曲赦京城繫囚於是置酒為會賜從官帛各有差
癸酉以尚書右僕射魏國公裴寂為左僕射中書令宋
國公蕭瑀為右僕射秋七月突厥頡利寇朔州遣皇太
子及秦王屯并州以備之八月東南道行臺左僕射輔
公祐據丹陽反僭稱宋王遣趙郡王孝恭及嶺南道大

使永康縣公李靖討之丙寅吐谷渾內附九月丙子突厥
退皇太子班師七年二月丁巳幸國子學親臨釋奠改大
總管府為大都督府三月戊寅廢尚書省六司侍郎增吏
部郎中秩正四品掌選事戊戌趙郡王孝恭大破輔公祏
擒之丹陽乃平四月庚子大赦天下頒行新律令以天
下大定詔遭父母喪者許終制五月造仁智宮於宜州
之宜君縣李世勣討徐圓朗平之六月辛丑幸仁智宮
秋七月音雋州地震山崩江水咽流八月戊辰突厥寇

并州京師戒嚴壬午突厥退京師解嚴八年夏六月甲子幸太和宮突厥寇定州命皇太子往幽州秦王往并州以備突厥八月并州道總管張公謹與突厥戰於大谷王師敗績中書令溫彥博沒於賊九月突厥退冬十月辛巳幸周氏陂校獵因幸龍躍宮九年春正月丙申命州縣修城隍備突厥尚書左僕射魏國裴寂為司空二月庚申加齊王元吉為司徒戊寅親祀社稷三月辛卯幸昆明池六月庚申秦王以皇太子建成與齊王元

吉同謀害已率兵誅之詔立秦王為皇太子總統萬幾大赦天下八月癸亥詔傳位於皇太子尊帝為太上皇徙居弘義宮改名太安宮貞觀二年三月戊申高祖讌西突厥使者於兩儀殿顧謂長孫無忌曰當今蠻夷率服古未嘗有無忌上萬歲壽高祖大悅以酒賜太宗太宗又奉觴上壽流涕而言曰百姓獲安四夷咸附皆尊奉聖旨豈臣之力於是太宗與文德皇后立進御膳并上服御衣物一同家人常禮是歲閱武於城西高祖親自

臨視勞將士而還置酒於未央宮三品已上咸侍高祖
命突厥頡利可汗起舞又遣南越部長馮智戴詠詩既
而笑曰胡越一家自古未之有也太宗奉觴上壽曰臣
早蒙慈訓教以文道爰從義旗平定京邑重以薛舉武
周世充建德等皆上稟筭壽幸而尅定三數年間混一
區宇天慈崇寵遂蒙重任上天垂祐時和歲阜被髮左
衽並為臣妾此豈臣智力皆由上稟聖算高祖大悅羣
臣皆呼萬歲九年五月庚子高祖大漸下詔從漢制以

日易月園陵制度務從儉約是日崩於太安宮之垂拱
前殿年七十謚曰大武皇帝廟號高祖葬獻陵上元元
年敬上尊號曰神堯皇帝天寶十三年上尊號曰神堯
大聖大光孝皇帝

太平御覽卷一百八

欽定四庫全書

太平御覽卷一百九

宋 李昉等 撰

皇王部三十四

唐太宗文皇帝

唐太宗文皇帝

唐書曰太宗文皇帝諱世民高祖第二子也母曰太穆
順聖皇后竇氏隋開皇十八年十二月戊午生於武功

之別館有二龍戲於館門之外三日而去高祖之臨岐
州太宗時年四歲有書生自言善相謁高祖曰公貴人
也且有貴子因見太宗曰龍鳳之資天日之表年將二
十必能濟世安民矣高祖懼其言將殺之忽失所在陰
採濟世安民之義以為名焉太宗幼聰睿玄鑑深遠臨
機果斷不拘小節時人莫能測也大業末煬帝於雁門
為突厥所困太宗應募救援隸屯衛將軍雲定興當時
謂定興曰必廣旗鼓以設疑兵且始畢可汗舉國之師

敢圍天子必以國家倉卒無援我張軍容令數十里幡
旗相續夜則鉦鼓相應虜必謂救兵畢集望塵而遁矣
不然彼衆我寡悉軍來戰必不能支矣定興從之師次
崞縣突厥候馳告始畢曰王師大至由是解圍而遁
及高祖之守太原太宗時年十八有高陽賊帥魏刀兒
自號歷山飛來攻太原高祖擊之深入賊陣太宗輕騎
突圍而射之所向皆披靡援高祖於萬軍之中遂以步
兵與太宗又奮擊大破之時隋祚已終太宗潛圖義舉

每折節下士推財養客及義兵起乃率兵畧徇西河克之拜領軍大都督右三軍皆隸焉封燉煌郡公大軍西上賈胡堡隋將宋老生率精兵二萬屯霍邑以拒義師會久雨糧盡高祖與裴寂議且還太原以圖後舉太宗曰本興大義以救蒼生當須先入咸陽號令天下遇小敵即班師將恐從義之徒一朝解體還守太原一城之地是為賊耳何以自全高祖不納促令引發太宗遂號泣於外聲聞帳中高祖召問其故對曰今兵以義動戰則

必克退還則必散衆散於前敵乘於後死亡須臾而至
是以悲耳高祖悟乃止八月己卯雨霽高祖引師趣霍
邑太宗恐老生不出戰乃將數騎先語其城下舉鞭指
麾若將圍城者以激怒之老生果怒開門出兵背城而
陣高祖與建成合陣於城東太宗及柴紹陣於城南老
生麾兵疾進先薄高祖建成墜馬老生乘之高祖與建
成軍咸却太宗自南原率二騎馳下峻坂衝斷其軍引
兵奮擊賊衆大敗各捨仗而走懸門發老生引繩欲上

遂斬之平霍邑至河東關中豪傑爭走赴義太宗請進
師入關取永豐倉以賑窮乏收羣盜以圖京師高祖稱
善太宗以前軍濟河先定渭北三輔吏民及諸豪傑詣
軍門請自効者日以千計扶老攜幼滿於麾下收納英
俊以備僚列遠近聞者咸自托焉師次於涇陽勝兵九
萬破猾賊劉鷄子以并其衆留殷開山劉弘基屯長安
故城太宗自趣司竹賊帥李仲文何潘仁向志善等皆
來會頓於阿城獲兵十三萬長安父老賣牛酒詣轅門

者不可勝紀勞而遣之一無所受軍令嚴肅秋毫無犯
尋與大軍平京城高祖輔政授唐國內史改封秦國公
會薛舉以勁卒萬人來逼渭濱太宗親擊之大破其衆
追斬萬餘級畧地至于隴坻義寧元年十二月復為右
元帥總兵十萬徇東都及將旋謂左右曰賊見吾還必
相追躡設三伏以待之俄而隋將段達率萬餘人自後
而至度三王陵發伏擊之段達大敗追奔至於城下因
於宜陽新安置熊穀二州戍之而還徙封趙國公高祖

受禪拜尚書令左武衛大將軍進封秦王加授雍州牧
三年七月總率諸將攻王世充於洛邑師次穀州世充
率精兵三萬陣於慈澗太宗以輕騎挑之時衆寡不敵
陷於重圍左右咸懼太宗命左右先歸獨留後殿世充
驍將軍雄信數百騎夾道來逼交鎗競進太宗幾為所
敗太宗遣行軍總管左右射之無不應弦而倒獲其大
將燕頤世充乃拔慈澗之鎮歸于東都太宗遣行軍總
管史萬寶自宜陽南據龍門劉德威自太行東圍河內

郡王君廓自洛口斷賊糧道又遣黃君漢夜從孝水河中下舟師襲回洛城克之黃河已南莫不響應城堡相次來降大軍進屯邙山九月太宗以五百騎先觀戰地卒與世充萬餘人相遇會戰復破之斬首三千餘級獲大將陳智世充僅以身免其總管楊慶遣使詣降李世勣率師出轅轅道安撫其衆榮汴洧豫九州相繼來降世充遂求救於竇建德四年二月又進屯青城宮營壘未立世充率衆二萬自方諸門臨穀水而陣太宗以精

騎陣於北邙山令屈突通率步卒五千渡水擊之因誠
通曰待兵交即放烟吾當率騎軍南下兵纔接太宗以
騎衝之挺身先進與通相為表裏賊眾殊死戰散而復合
者數焉自辰至午賊眾始退縱兵乘之俘斬八千人於
是進營城下世充不敢復出但嬰城自守以待竇建德
之援建德以兵十萬來援世充至于酸棗蕭瑀屈突通
封德彝皆以腹背受敵恐非萬全請退師於穀州以觀
之太宗曰世充糧盡內外離心我當不勞攻擊坐收其

弊建德新破孟海公將驕卒愾吾當進據武牢扼其襟
要賊若冒險與我爭鋒破之必矣如其不戰旬日間世
充當自潰若不速進賊入武牢諸城新附必不能守二
賊併力將若之何通等又請解圍就險以俟其變太宗
不許於是留通輔齊王元吉以圍世充親率步卒三千
五百人趣於武牢建德自滎陽西上築壘於板渚太宗
叱武牢相持二十餘日諜者曰建德伺軍芻盡候牧馬
於河北因將襲武牢太宗知其謀遂牧馬于河北以誘

之詰朝建德果悉衆而至陳兵汜水世充將郭士衡陣
於其南綿亘數里鼓譟諸將大懼太宗將數騎升高丘
以望之謂諸將曰賊起山東未見大敵今度險而罵是
無政令逼城而陣有輕我心我按兵不出彼乃氣衰陣
久卒飢必將自退追而擊之無往不克吾與公等必以
午時後破之建德列陣自辰至午兵士飢倦皆列坐又
爭飲水遂巡欲退太宗曰可擊矣親率輕騎誘之衆繼
之建德回師而陣未及整列太宗先登擊之所向皆靡

俄而衆軍合戰，罵聲四起。太宗率史大柰、程璿、金秦叔寶、宇文歆等揮幡而入，直突出其陣後，張我旗幟，賊顧見之大潰，追奔三十里，生擒建德於陣。太宗數之曰：我以干戈問罪，本在王世充得失存亡，不預汝事，何故越境犯我兵鋒？建德股慄而言曰：「今若不來，恐勞遠取。」乃將建德至東都城下，世充懼，率其官屬二千餘人詣軍門請降。山東悉平。太宗入據宮城，令蕭瑀、竇軌等封守府庫，一無所取。令記室房玄齡收隋圖籍，於是誅其同

惡殺達等五十餘人大饗將士頒賜有差高祖令尚書
左僕射裴寂勞于軍中六月凱旋太宗親披金甲鐵馬
一萬騎甲士三萬人前後部鼓吹俘二偽主及隋氏器
物輦輅獻於太廟高祖大悅行飲至禮以享焉高祖以
自古舊官不稱殊功乃別表徽號用旌勲德十月加號
天策上將軍陝東道大行臺位在王公上增邑二萬戶
通前三萬戶賜金輅一乘袞冕之服玉壁一雙黃金六
十斤前後部鼓吹及九部之樂班劍四十人于時海內

漸平太宗銳意經籍開文學館以待四方之士行臺司
勲郎中杜如晦等十有八人為學士每更直閣下降以
溫顏與之討論經義或夜分而罷八年加中書令九年
皇太子建成薨王元吉謀害太宗六月太宗率長孫無
忌尉遲敬德房玄齡杜如晦等於玄武門誅之甲子立
為皇太子庶政皆斷決八月癸亥高祖傳位於皇太子
太宗即位於東宮顯德殿遣司空裴寂柴告于南郊大
赦天下癸酉放掖庭宮女三千餘人丙子立妃長孫氏

為皇后已卯突厥寇高陵辛巳行軍總管尉遲敬德與
突厥戰於涇陽大破之斬首千餘級癸未突厥頡利至
渭水便橋之北遣其軍帥執失思力入朝為覘自張形
勢太宗命囚之親出玄武門馳六騎幸渭水之上與頡
利隔津而語責以負約俄而眾軍繼至頡利見軍容既
盛又知思力就拘由是大懼遂請和詔許焉即日還宮
乙酉又幸便橋與突利殺白馬設盟突厥引退九月丙
戌頡利獻馬三千疋牛萬口帝不受令頡利歸所掠中

國戶口丁未引諸軍衛騎兵統將等習射於顯德殿庭
謂將軍以下曰自古突厥與中國更有盛衰若軒轅善
用五兵即能北逐獯鬻周宣驅馳方邵亦能制勝太原
至漢晉之君逮於隋代不使兵士素習干戈突厥來侵
莫能抗禦致使中國生民塗炭於寇手我今不使汝等
穿池築苑造諸淫費農民恣令逸樂兵士唯習弓馬庶
使汝關戰亦望汝前無橫敵於是每日引數百人於殿
前教習帝親自臨試射中者賞弓刀布帛自是後士卒

皆為精銳十月癸未立中山王承乾為皇太子貞觀元年正月己酉改元三月癸巳皇后親蠶十二月壬午上謂侍臣曰神仙事本虛妄空有其名秦始皇非分愛好遂為方士所詐乃遣童男女數千人隨其入海求仙藥方士避秦苛虐因留不歸始皇猶踟躕海側以待之還至沙丘而死漢武帝為求仙乃將女嫁道術人事既無驗便行誅戮據此二事神仙不須妄求也二年正月丙戌韃

韃

上音未
下音曷

內屬三月丁卯遣御史大夫杜淹巡關內諸

州出御府金寶贖男女自賣者還其父母庚午大赦天下夏四月己卯詔骸骨暴露者令其所在埋瘞丙申契丹內屬初詔天下州縣并置義倉六月庚寅皇子治生三年春正月辛亥契丹渠帥來朝戊午謁太廟癸亥親耕籍田四月辛巳太上皇徙居太安宮甲子太宗始於太極殿聽政六月戊寅以旱親錄囚徒遣長孫無忌房玄齡等祈雨于名山大川中書舍人杜正倫等往關內諸州慰撫又令文武百官各上封事極言得失是歲戶

部奏言中國人自塞外來歸及突厥前後內附開西夷
為州縣者男女一百二十餘萬口四年正月乙亥李靖
大破突厥獲隋皇后蕭氏及煬帝之孫正道送之京師
二月癸亥幸溫陽甲辰李靖又破突厥於陰山頡利可
汗輕騎遠遁甲寅大赦賜酺五月三日庚辰大同道行
軍副總管張寶相生擒頡利可汗獻于京師甲午以俘
頡利告于太廟夏四月御順天門軍吏執頡利以獻捷
自西北諸蕃咸請上尊號為天可汗於是降璽書冊命

其君長則無稱之九月庚午令收瘞長城之南骸骨仍
令致祭壬午令自古明王聖帝賢臣烈士墳墓無得芻
牧春秋致祭冬十月壬辰幸隴州曲赦岐隴二州給復
一年十月校獵於貴泉谷十二月校獵於魚龍川自射
鹿獻於太安宮甲子至自隴州戊寅制決罪人不得鞭
背以明堂圖五臟繫背也高昌王麴文泰來朝是歲斷
死刑二十九人幾至刑措山東至于海河南至于嶺皆
外戶不閉行旅不賫糧焉六年十二月辛未親錄囚徒

歸死罪者二百二十九人於家令明年秋來就刑其後
應期畢至詔悉原之是歲黨項諸羌前後內屬三十萬
口八年二月乙巳皇太子加元服丙午賜天下酺三日
三月庚辰幸九成宮五月丁丑上初戴翼善冠貴臣服
進德冠九年五月太上皇崩于太安宮七月甲寅增修
太廟為六室冬十月庚寅葬高祖于獻陵十三年春正
月乙巳朔謁獻陵曲赦三原縣及行免縣人租四月戊
寅幸九成宮甲申阿史那結社爾犯御營伏誅壬寅雲

陽石燃者方丈晝如灰夜則有光投草木上則焚歷年
而止十二月壬辰狩於咸陽是歲滁州言野蠶食櫟音斛
葉成繭大如柰其色綠色收六千五百七十石高麗新
羅西突厥吐火羅康國安國波斯踈勒于闐焉耆高麗
新昌林邑昆明及荒服蠻首相次遣使朝貢十五年詔
以來年二月有事泰山所司詳定儀制五月壬申并州
僧道及老人等抗表以太原王業所因明年登封以後
願時臨幸上於武城殿賜宴因從容謂侍臣曰朕少在

太原喜羣聚博戲暑往寒逝將三十年矣時會中有舊識上者相與道舊以為笑樂因謂之曰他人之言或有面諛公等朕之故人實以告朕即日政教於百姓何如人間得無疾苦耶皆奏即日四海太平百姓歡樂陛下之力也臣等餘年日惜一日但眷戀聖化不知疾苦因固請過并州上謂曰飛鳥過故鄉猶躑躅徘徊朕於太原起義兵定天下復少小遊戲誠所不忘盛禮若畢或冀與公等相見於是賜物各有差六月戊申詔天下諸

州舉學博古今及孝悌淳篤文章秀異者並以來年二月總集太山己酉有星孛於太微犯郎位丙辰停封泰山避正殿以思命尚食減膳秋七月甲戌孛星滅十六年冬十一月丙辰狩于岐山辛酉使祭隋文帝陵丁卯宴武功士女於慶善宮南門酒酣上與父老等涕泣論舊事父老人等逶迤起為舞爭上千萬歲壽上各盡一卮庚午至自岐州十一月癸卯幸溫湯甲寅狩於驪山時陰塞晦冥兵圍斷絕上乘高望見之欲捨其罰恐虧軍

令乃迴轡入谷避之十七年正月戊申詔圖畫司徒趙國公無忌等勲臣二十四人於凌煙閣三月丁巳熒惑守心前星十九日而退夏四月皇太子承乾有罪廢為庶人丙戌立晉王治為皇太子大赦賜酺三日丁亥加司徒長孫無忌太子太師司空房玄齡太子太傅特進蕭瑀太子太保兵部尚書李勣為太子詹事仍同中書門下三品庚寅上親謁太廟以謝承乾之過五月乙丑手詔舉孝廉茂才異能之士十八年十二月命太子詹事英

國公李勣為遼東行軍總管出柳城禮部尚書江夏郡
王道宗副之刑部尚書鄒國公張亮為平壤道行軍總
管以舟師出萊州左領軍常河瀘州都督左難副之約
天下甲士召募十萬並趣平壤以伐高麗十九年春二
月庚戌上親統六軍發至于洛陽乙卯詔皇太子留定
州監國高士廉攝太子太傅與侍中劉洎中書令馬周
太子少詹事張行成太子右庶子高季輔五人同掌機
務以吏部尚書安德郡公楊師道為中書令贈殷比干

為太師諡曰忠烈命所司封墓葺祠堂春秋祀以少牢
上自為文以祭之春三月壬辰上發自定州以司徒長
孫無忌中書令岑文本楊師道從之夏四月癸卯誓師
於幽州城南因大饗六軍以遣之癸亥李世勣攻蓋牟
城破之夏五月丁丑車駕渡遼東甲申上親率鐵騎與
世勣命圍遼東城因烈風發火弩斯須城上屋樓皆焚
麾戰士令登乃拔之六月丙辰師次安市城丁巳高麗
將高延壽高惠真帥兵五十萬來援安市以拒王師李

世勣率兵奮擊上自高峯引軍臨之高麗大潰殺獲不
可勝紀延壽等以其衆來降因名所幸為駐蹕山刻石
紀功焉賜天下大酺二日秋七月李世勣進軍攻安市
城至九月不克乃班師冬十月丙辰入臨渝關皇太子
自定州迎謁戊午次漢武臺刻石以紀功德十一月幸
幽州癸酉大饗還師十二月幸并州二十年春正月上
在并州遣大理卿孫伏伽黃門侍郎褚遂良等二十四
人以六條巡察四方黜陟官吏庚辰曲赦并州宴從官

及起義諸人賜帛給復有差三月車駕至京師六月遣
兵部尚書固安公崔敦禮特進英國公李世勣擊破薛
延陀於鬱督山北前後斬首五千餘級虜男女三萬餘
人二十一年春正月詔以來年二月有事泰山甲寅賜
京師酒醕三年八月詔以河北大水停封禪辛未骨利
幹國遣使貢名馬二十三年二月辛酉大赦丁卯太宗
以不豫勅皇太子於金液門聽政是月日赤無光夏四
月己亥幸翠微宮五月乙巳上疾甚令草遺詔有頃崩

於含風殿年五十二遺命令皇太子即位於柩前喪紀
宜依漢制秘不發喪庚午遣舊將統飛騎勁兵從皇太
子先還京師發六府甲士四千人分列於道及安化門
翼從乃入大御與從侍卿如常士申發喪六月甲戌殯
于太極殿諡曰文皇帝廟號太宗葬昭陵上元元年上
尊號曰文武聖皇帝天寶十二載改上尊號為文武大
聖大廣孝皇帝

太平御覽卷一百九